

**Dissertatio medica inauguralis de morbis senectutis ... / submittit Petrus Buteux.**

**Contributors**

Buteux, Petrus.  
Albinus, Bernhard Siegfried, 1697-1770

**Publication/Creation**

Lugduni Batavorum : Apud Joh. Arn. Langerak, 1726.

**Persistent URL**

<https://wellcomecollection.org/works/cknwadrk>

**License and attribution**

This work has been identified as being free of known restrictions under copyright law, including all related and neighbouring rights and is being made available under the Creative Commons, Public Domain Mark.

You can copy, modify, distribute and perform the work, even for commercial purposes, without asking permission.



Wellcome Collection  
183 Euston Road  
London NW1 2BE UK  
T +44 (0)20 7611 8722  
E [library@wellcomecollection.org](mailto:library@wellcomecollection.org)  
<https://wellcomecollection.org>

DISSERTATIO MEDICA  
INAUGURALIS  
DE  
MORBIS SENECTUTIS.

QUAM,  
ANNUENTE DEO TER OPT. MAX.

*Ex Auctoritate Magnifici Rectoris,*

D. BERNARDI SIEGFRIED ALBINI,  
MEDICINÆ DOCTORIS, ANATOMES, ET CHIRUR-  
GIÆ IN ACADEMIA LUGDUNO BATAVA PRO-  
FESSORIS ORDINARIJ:

NEC NON

*Amplissimi SENATUS Academici Consensu, & Nobilissima  
Facultatis MEDICÆ Decreto,*

PRO GRADU DOCTORATUS,

Summisque in MEDICINA Honoribus & Privilegiis ritè &  
legitimè consequendis,

*Publico ac solenni Examini submittit.*

PETRUS BUTEUX, Medioburgo-Zelandus.

*Ad diem 21. Junii 1726. hora locoque solitis.*



LUGDUNI BATAVORUM,  
Apud JOH. ARN. LANGERAK. 1726.







DISSERTATIO MEDICA  
 INAUGURALIS  
 DE  
 MORBIS SENECTUTIS.

## §. I.



Maximam inter Corpora animalia adeoque & humanum, de quo erit sermo, & inter Vegetabilia esse similitudinem, ut jam olim Viri Egregii scripsere, sic nos hodie satis evidenter scimus. Hæc enim similitudo non solum obtinet in structura partium quarundam simili, neque etiam in organis iisdem operationibus in utroque corpore perficiendis communibus, similibusque destinatis, uti generationi, nutritioni &c., in quibus quanta sit convenientia, docebunt *Malpighii* & aliorum observata. Verum præter hæc omnia aliquid duobus hisce Corporibus commune est, quo intellecto, etiam rerum imperitissimus inter hæc corpora analogiam intelliget, scil: utriusque hujus corporis Ætatis, seu Vitæ cursus in tres partes divisio, desumpta à quibusdam in hisce corporibus, certo tempore factis, mutationibus, magis minusve manifestis.

Prima harum pars incipit cum mollissima illa humani Corporis recenter nati teneritudine, (licet enim sciam ad hanc primam partem etiam pertinere illud tempus, quo conceptus fit in Utero usque ad illud, quo foetus in lucem editur; tamen quia mutationes, quæ hoc tempore fiunt, adeo insensibiles sunt, neque observatori omni tempore opportunitas datur sensibiles observandi, ideo à nato homine tantum fit initium) pergitque per innumeros corporis incrementi gradus, ad tempus illud quo homo ad incrementi ἀκμὴν pervenit, quæ est annus vigesimus quintus. Habet interim hæc prima Ætas, quemadmodum & reli-



quæ, sub se alias *Ætatis* subdivisiones, ut *Pueritiam*, *Pubertatem*, *Adoleſcentiam* &c. : quibus examinandis ſuperſedemus. Huic nunc primæ animalis *Ætati* reſpondet etiam prima corporis plantaris *Ætas*, quæ incipit dum tenera valde adhuc planta primò prodit de terra, quæ ſenſim magis magisque frondeſcit, partesque explicat, & pergit etiam ſic creſcere ad illud tempus, quo florem gerit, quod ultimum eſt naturæ opus, acceperitque tunc incrementi terminum. Altera, (ut in hiſce brevis ſim) humanæ *Ætatis* pars incipit ab ultimo prioris *Ætatis* termino, à quo homo ad aliud iterum tempus, cujus terminus eſt annus quinquageſimus, perſtat, h. e. increſcit nec decreſcit, niſi natura impediatur. In hac *Ætate* homo ſtatum roboris &c. jam accepiſſe videtur. Cum hac ſecunda hominis *Ætate* & illam corporis plantaris conferri poſſe puto; hæc quoque abſolvit omne illud tempus, à quo incepit flores gerere, uſque dum illi iidem decidui fiunt; per totum hoc tempus Planta perſtitit, h. e. non crevit neque decrevit; niſi quædam infortunia illis accidant. Tertia tunc ſequitur corporis plantaris *Ætas*, incipiens ab illo tempore, quo florem deponere incipit, pergitque ſic omne illud tempus, quo hoc corpus multa ſui decrementi & interitus ſigna præbet, ut ſunt foliorum ariditas, canities, curvaturæ, lapſus &c.; donec tandem penitus interierit.

Huic nunc periodo reſpondet & ultima humanæ *Ætatis* pars. Incipit hæc ab ultimo ſecundæ *Ætatis* termino, h. e. ab anno quinquageſimo, pergitque per infinitos corporis decrementi gradus, multa quoque ſigna ejus interitus præbens, quorum quædam in initio fateor, vix manifeſta, ſed poſtea manifeſtiſſima evadunt; & tandem terminatur ad ultimum illud *Vitæ* punctum, quo homo vivere deſiſſe dicitur: quod eſt annus ſeptuageſimus quintus, vel octogეſimus, plus minusve, prout homo *Vitam* magis vel minus longam ducit; ad hos enim annos humanæ *Ætatis* curriculum à temporibus *Moyſis* ad noſtra uſque ut plurimum ſubſtitiffe viſum eſt: adeo ut anni, quibus homo creſcit, perſtat, decreſcit, numero quodammodo inter ſe conveniant; nam cuique *Ætatis* parti annos attribuimus viginti & quinque, qui ter ſumpti integram hominis *Ætatem* abſolvunt. Interim monere hic debeo, dicta hæc in omnibus accurate non obtinere, ſed mire hæc variare pro variis circumſtantiis, præcipue



cipue pro Vitæ conditione, verum si naturæ liber cursus concedatur, tunc dicta & dicenda adhuc locum habere volo.

Quemadmodum in duabus reliquis, sic præcipue in tertiâ hujus Ætatis progressu humanum corpus multis morbis obnoxium evadit: mirabiliter enim illud in sua structurâ & functionibus mutari cernimus; æquilibrium sc. illud inter solida & fluida, per quod antea corpus perfectâ sanitate fruebatur, vacillare incipit, h. e. solida copiâ & viribus fluidis prævalere sensim incipiunt, unde functiones à debita proportionemotus & resistentiæ solida inter & liquida pendentes à sanis deflectere incipiunt: Unde multa mala & incommoda à causis illi Ætati tantum propriis pendentia hominem invadunt; nam revera ut cuique Ætati sua peculiaris est sanitas, ita suæ sunt molestiæ suusque morbus, unde hi in pueros, illi in adultos, alii in Senes, Auctore *Hippocrate*, sævire consueverê morbi. Corpus nunc, quodcunque morbosâ hâc in solidis partibus diathesi, morbisque ex hac ut causa productis laborare incipit, ad Senectutem pervenisse dicimus, quæ in initio pauca & obscura adhuc suæ præsentiae indicia præbet, verum postea plurimis & manifestissimis stipata se prodit signis, & sic perfectâ evadit. De hisce nunc *Senectutis Morbis*, sive *Senectute Morbosa* Dissertationis materiam, ut egregiæ Academiæ Legi satis fiat, eligere lubuit. Non dubito, quin Benevolus Lector inveniat forte minus consona, & prætervisa quædam, quæ necessario addenda esse judicabit. Sed materiam tam gravem, & à paucis pertractatam, à me Juvene adhuc, paucarum rerum perito, pro dignitate tractari posse, quis exspectaret? Interim ut ea, quæ legendo collegi, & ex doctorum Virorum ore hausi, huc spectantia, grato animo accipiat Lector, etiam atque etiam rogo.

§. 2. Ex paucis itaque, quæ (§. 1.) dixi, credo liquet, cum dico me de Senectutis Morbis acturum, non omnes indigitare morbos, qui corpora senilia sine differentia invadunt, inter quos quidam cuicunque Ætati communes, & à diversissimis causis externis pendentes sunt: sic v. g. Pleuritis, Angina, Variolæ, Febres quaecunque aliquando invadunt æque corpus juvenile, vel alius ætatis ac senile, propter eandem aëris constitutionem, vel idem vitium in sex rebus non naturalibus commissum. Sed de his morbis minime instituitur præsens inquisitio; verum de iis,



qui in corporibus senilibus solis fiunt ex necessitate, & quidem à causis illi ætati tantum propriis; & qui reverà tantum contingunt per *Privationem* & *Indigentiam*, non vero per *Violentiam*. Suntque hi numerosi satis, adeo ut omnes corporis functiones sensim lædi, totusque ejus habitus mire depravari incipiant. Horum tamen omnium, facie quamvis maximè diversorum, causam primam crediderim quærendam in morbosa illa (§. 1.) partium solidarum diathesi, quâ natâ statim & liquida in consensum trahantur, & sic omnes illi morbi facile producuntur.

Ut autem horum omnium distincta (quantum possibile erit) fiat enarratio, primo videbimus, quomodo Corpus humanum à natura dispositum sit, ut sensim hos morbos sic producat: (qui etenim naturæ vias non noverit, quomodo is illi quodammodo occurrere possit, optime rogat *Verulamius*.) tunc secundo examinandi sunt ipsi affectus à mutata fabrica senescentis corporis producti: sed eo iterum ordine, ut, quantum fieri potest, agamus primo de illis qui primi apparent, quique incipientis tantum Senectutis indicia præbent, dein, qui eam magis provectam, & tandem qui Senectutem perfectam demonstrant, & quibus ultimo Mors senilis harum *Ærumnarum* finem imponit; de quâ pauca quoque erunt annotanda. Videamus ergo.

§. 3. Corpus humanum postquam primam (§. 1.) suæ ætatis periodum percurrit, h. e. ad sui incrementi terminum pervenit, haud diu in secunda subsequente manere potest, quamvis in hac *Ætate* credibile sit corpus perfectissima omnium Sanitate frui, cæteris sc. paribus; vasa enim sunt eo tempore maxime in æquilibrio cum suis humoribus; ab hoc enim æquilibrio sanitatem maxime pendere quis negabit. Verum idem illud corpus à summo Conditore sic est fabrefactum, ut per ipsam vitam perque actiones à vita inseparabiles sensim sic mutetur, ut à sanitate discedat, & ad varios producendos morbos aptum evadat, sicque ad sui interitum tendat. Per Vitam enim hic intelligo assiduum illum humorum circuitum, seu actionem in vasa horumque in liquida reactionem, quâ perdurante quamvis minimâ, animal vivere adhuc dicitur. Hæc enim humorum actio in vasa corpus ex minimâ & molli in vastam & ingentem, qualis est hominis adulti, molem excrescere fecit, eique dein suum robur & constantiam pro tempore conciliat, & tandem denuo idem illud



lud perire & decrefcere facit. Adeo ut homo, licet ab externis quantum fieri poteft injuriis immunis, per propriam vitam deſtruatur. Hoc autem revera fic fieri, ex ſequentibus, ut puto, concipiemus.

§. 4. Totam noſtram machinam, quoad ſolida ex vafis minimis h. e. ex nervis concreviſſe probabile valde reddunt *Malpighiana* in pullo, & *Ruyſchiana* in Embryone obſervata; ſc. utrorumque horum Corporum ſtamina prima eſſe Cerebrum, Cerebellum cum Carina, & ex his minimis reliqua ſenſim majora, donec tandem ad vas maximum perventum ſit, creviſſe, credibile eſt. Interim quædam ex his minimis, quamdiu homo vivit per actionem §. 3. deſcriptam abolentur & consolidantur, ita ut vafis naturam amittant: ſed talis quædam abolitio in corpore naſcente & nato omnino requirebatur, ut ſenſim machina hæc ſuum robur & firmitatem in diverſis partibus variam acquireret, priſtinamque mollitiem & teneritudinem deponeret, & ſic injuriis inevitabilibus, quibus infans impar eſt, reſiſtere poſſet. Verum poſtquam jam homo ad ſui incrementi terminum pervenit, & requiſitam in ſolidis partibus firmitatem & robur acquiſivit, adeo ut ex harum conſiderata proportione, ratione ad fluida habitâ, homo diu ſanus perſiſtere poſſe videretur, tamen perdurante eadem illa actione in vaſa ut prius, ſequentia fiunt.

§. 5. 1°. Partes noſtrorum ſolidorum minimæ, quarum applicatione ſibi mutuo fiunt fibrillulæ ſolidæ, per repetitam Vitæ Actionem tam valide compinguntur & adunantur, ut requiſita in his flexilitas pereat, h. e. partes continuo magis reſiſtunt illi fluidorum actioni, quæ omnino harum reſiſtentiam ſuperare debet, ut fiant illi effectus qui in ſanitate obtinent: adeo ut hîc jam partes ſolidorum minimæ morbo laborare incipiant: hæc denuo fibræ ad ſe mutuo applicatæ faciunt membranam minimam, unde idem vitium obtinebit in hac membrana: ſed quia in tali membrana non modo Elementa, juxta longitudinem ſibi appoſita, magis compinguntur, ſed etiam fibra ad fibram juxta latera, hinc cohæſio ſeu reſiſtentia in tali membrana major eſt quam in fibrâ; & hæc ſic augetur prout plures tales fibræ ſibi apponuntur. 2°. Vaſa minima ex fibris vel membranâ (n°. 1. hujus §.) in ſe convolutâ patientur eadem, ſed cohæſio in iis multo major ſit, nam fibræ, quæ in membrana extremæ erant, in vaſe etiam  
co-



cohærent sibi adeo, ut nulla sit quin ubique alteri cohæreat. Hinc tale vasculum fit minus flexile, h. e. actioni sui fluidi percurrentis magis resistens: nam fibræ conantur nunc magis se applicare ad axin sui canalis, quem formant, hinc vas redditur angustius, simul & brevius, unde expulsionem & repulsionem sui fluidi continuo magis idoneum fit; sed hoc maxime per actionem liquidi per vala majora fluentis contingit. 3°. Vasa majora (n°. 2. hujus §.) voco quorum latera, seu membranæ, non conflata sunt ex fibris sibi varie appositis, quemadmodum priora, sed quæ constant ex vasis minimis loco fibrarum, applicatu vel intortu unitis cavum formantibus. Vas denuo majus, quam hoc, voco, cujus latera non componuntur ex vasis minimis, sed ex vasis secundi generis, quorum latera adhuc constant ex minimis; sicque revera pergere possemus, donec ad vas maximum perventum sit; quodque hoc in corpore obtineat, quis hodie dubitat? Ponamus, pro exemplo, Arteriam Aortam, utpote vas in corpore maximum, illud ex quinque tunicis constare dicitur, & revera in tot & forte plures dividi posset: exterior ejus tunica ab extima pericardii membranâ orta, nonne tota quanta vasculis à coronariis datis constat? omnino. Membrana ergo hæc extima non constat fibris sed vasis, quæ vasa, quia adhuc sunt maxima inter minima, nondum constant fibris, sed aliis vasis minoribus, donec tandem perventum sit ad minimum vas ex fibris conflatum. Positis his, videamus quid his vasis accidat.

§. 6. Majora hæc vasa, quatenus ex minimis vasis constant, primò patientur eadem mala (n°. 1. 2. §. 5.) unde etiam robur in his mire augetur propter majorem cohæsiōem in minimis. Sed secundò, altera majoris roboris ratio pendet à motu liquidi, per majorem canalem continuo ruentis, ejusque latera distendentis, quæ cum ex vasis constant continuo à distensione comprimuntur, sic ut latera minimorum ad se magis magisque accedant, & liquidum continendum tandem expellant: quo expresso concrescunt mox latera; quod ubique in corpore fit, ubi liquidum sese inter duas membranas interponens consumitur vel deficit: Videmus hoc in Pleuritide, ubi pleura cum pulmonis membranâ sæpissimè concrescit: aliquando etiam intestina sic concrescunt; idem videmus ubi panniculus adiposus



sus est consumptus à morbo quocunque, quod ipse tendo concreseat cum partibus vicinis, unde membri immobilitas, & quæ plura ejusmodi. Lateribus vasorum sic unitis, vas illud perit, ut & functio ab ejus integritate pendens, naturamque fibræ solidæ vel membranæ induit, sed longe crassioris & fortioris quam erat membrana hujus vasis minoris nondum concreti: Idem de novo illud contingere potest in subsequenter vasis, per distensionem liquidi decurrentis per vas cujus latera iterum format, & sic progredi posse videtur minimorum jactura, donec nulla nisi maxima supersint vasa. Probabile enim est fuisse tempus quo nostræ fibræ conflatae tantum fuere ex minimis partibus, & omnes nostri canales ex fibris minimis; sed haud diu duravit, nam jam in utero materno fiunt ungues, cartilagine & ossa, adeo ut à prima hominis origine per totam ejus vitam continuo vasa quædam comprimi, concreescere, & deleri, probabile sit: unde quoque videmus, actionem vasis maximi esse destructionem minimi; nam hoc patitur actionem liquidi per vas majus ruentis: quo nunc fluida majori impetu, & copiâ per vasa majora feruntur, eo minimorum abolitio continget citius; per quæ omnia robur & cohæsiō in vasis majoribus insigniter crescunt; nam hic non modo elementa juxta longitudinem sibi magis adunantur, neque solum fibræ ad se mutuo magis compinguntur, sed huc accedit tertiō, consolidatio vasorum minimorum, quæ nunc tamquam novæ membranæ solidiores resistantiam in vasis majoribus mire augent; horum nunc latera, propter auctam fibrarum orbicularium in omni peripheriæ puncto resistantiam, sese valide contrahunt; contrahunt sese quoque magis fibræ longitudinales, unde hæc ambæ minuunt vasis capacitatem: unde liquida per vasa hæc majora, vel maxima fluentia, insignes iterum patiuntur mutationes; de quibus in transitu quædam etiam annotabimus. Quia nunc ubique per corpus vasa hæc sunt distributa, & majora vicinis minoribus accumbunt, hinc ubique fiet hæc abolitio, ne indurissimis quidem ossibus exceptis. Quid enim olim ossa aliud fuere, quam vasa, quæ consolidata membranæ, cartilagine, & tandem ossa evasere; quæ sensim magis magisque consolidantur & vasis destituantur? Unde in his & reliquis partibus, sic mutatis, mira occurrunt phænomena, de quibus postea.



§. 7. Ex iis itaque, quæ (§. 6.) diximus, ni fallor patet, quonam morbo homo ad tertiæ suæ *Ætatis* finem pergens laborare incipiat? defectu sc. vasorum minimorum, & ex hoc præcipue natâ in partibus solidis rigiditate, quæ cum sit præcipuus Senectutem concòmitantium morbus, simul & causâ aliorum plurium morborum, quædam de hâc Rigiditate, antequam ad alia pergam, dicenda judicavi.

§. 8. Per Rigiditatem itaque (ut optimâ *Clariff. Boerhaave* definitione utar) intelligo validam illam partium minimarum fibras, fibrarum membranas (nº. 1. §. 5.), membranarum vasa minora (nº. 2. §. 5.), vasorum minorum majora (nº. 3. §. 5.) &c. constituentium cohæSIONem, qua fit ut hæ partes se mutuo trahentes & accurtare conantes, vix amplius cedant illi motui impresso, per quem omnino moveri & in cohæSIONe mutari deberent, ut obtinerent illi effectus, quos sanitas exigit. Eleganti sane modo *Clariff. Boerhaave* hanc rem in collegiis privatis dilucidare semper conatur Magnetis exemplo, qui, si ab utroque latere ei duo ferri frustra apponantur, adeo ut Magnes in medio hæreat, nobis ideam dabit fibræ solidæ ex elementis sive partibus minimis constantis. Duo hæc ferri frustra, si ponantur in distantia à Magnete illâ, ut sint intra ejus activitatis sphæram, continuo ad illum accedunt quodam cum impetu, & Magnes immobilis manet, cumque eo quasi unum corpus constituunt, adeo ut quædam vis sit adhibenda, ut à Magnete removeantur. Si nunc ponamus quod hæc vis, qua Magnes sic trahit ferrum, duplo major fiat, duplâ tunc quoque indigemus vi, qua hoc ferrum à Magnete removeri posset. Simili fere modo se res habet cum solidis nostris minimis, hæc enim sic sibi cohærent ut requiratur certa vis, quæ illas extendat, quâ ablatâ, hæ partes utpote in statu violento constitutæ continuo ad se accedunt, adeo ut quæ in medio hærent fibræ trahant ad se extremas minus cohærentes, hinc duæ extremitates talis fibræ vel membranæ, ut lineæ considerandæ, ad se accedunt. Quo nunc cohæSio hæc major fit in partibus, eo nixus ille, quo partes se sic contrahunt, magis augetur, sic ut non amplius cedant illi vi, quâ antea superabantur.

§. 9. Facile nunc ex dictis (§. 8.) distinguimus Rigiditatem ab illâ partium fibrosarum, vel membranarum omnino requisita



sita cohæſionis vi, qua fit ut hæ partes, à se nonnihil divulsæ absque ruptione tamen, in priorem statum sese iterum restituant, ablatâ causâ distrahente. Vocamus hanc vim Elasticam, quæ insigniter augeri potest, prout increſcit robur in partibus, hinc ubi summum est robur in partibus sive Rigiditas, ibi summa est Elasticitas: estque hæc omnibus corporibus fere naturalis, quam late autem hæc pateat, docebit inter alios Egregius *Bel- lini*. Et quemadmodum paucissimas invenimus naturæ operationes ad cujus partes contractio hæc naturalis non sit vocanda, sic etiam tota Vita nostra & sanitas ab hac Elasticitate in fibris &c. dependet: quâ, quæso, aliâ vi, solida nostra in fluida agunt quam hac sua Elastica? Per pauca modo minuta hæc si abesset, actum foret de hominis vitâ. Sed ut Sanitas maneat perfecta, debet hæc vis intra justos manere limites, si enim minuitur nimis, fit debilitas in partibus solidis & inertia in liquidis contentis. Si vero augetur nimis, partes nimia Rigiditate laborant, quemadmodum in Senectute, cui Rigiditas inseparabilis comes est.

§. 10. Dico nunc, quod pro hujus Rigiditatis incremento, celeriori vel tardiori, majori minorive, incommoda Senectutis quatenus ab hac Rigiditate pendent, etiam celerius vel tardius hominem opprimant: magna enim in his est varietas, adeo ut morbosa hæc in solidis partibus dispositio citius, & magis obtineat in hoc, quam illo homine, prout sc: causa hanc Rigiditatem efficiens fortius, diutiusque egit, hoc est, quo solidorum & fluidorum actio inter se major est. Adeo ut vita actiuosa valde corpus ad Senectutem maturam disponat. Hujus autem asserti veritas clara erit, si modo attendamus, quid corporibus contingat illis, quibus vis Vitæ magna, & qui talem ducunt vitam, qua hæc actio valde augetur. Nonne videmus quod multa corpora, præcipue juvenilia, postquam febribus aliquamdiu durantibus oppressa fuere, procera & robusta assurgant, quæ antea debilia erant, & vix paria iis peragendis, quæ Sanitas & Vitæ ratio postulabant? An vero aliud quid tamquam roboris hujus aucti causa statuendum hîc est, præter motum illum febrilem? nequaquam; sed hîc vitæ vis magna fecit eadem intra parvum tempus, ad quæ efficienda Vita moderata plurimum temporis impendisset. Idem illud confirmatum videmus in cor-



poribus, jam à juvenili Ætate magnis laboribus applicitis, ut cursui, equitationibus, agriculturis &c., adeoque talem vitam degentibus, quâ solidorum & fluidorum actio valde viget, an non hæc corpora citius ad sui incrementi terminum perveniunt, adeoque etiam citius robur & firmitatem in partibus solidis acquirunt, quam si vitam minus actuosam egissent? omnino certe. Attendat modo quis ad rusticorum præcipue pueros, qui, cum adhuc dum vix ad annum septimum vel octavum pervenere, jam applicantur magnis laboribus & exercitiis, nonne videbit quod citò ad sui incrementi terminum perveniant, sed simul, cum nondum quadragesimum agunt annum, quod tum jam rigidi & incurvi quasi facti sint? sic ut jure hic locum habeat proverbium, quod cito fit, cito perit. Sed quid in his confirmandis diutius inhæream, norunt enim ipsi Equifones, homines harum rerum cæterum imperiti, quod si equos juniores, pulchros atque agiles validis laboribus vel cursibus diu applicent, quod brevi evadant rigidi atque immobiles fere. Varia nunc quoque sunt, quæ intro assumpta vel externe corpori applicata morbosam hanc in partibus solidis diathesin inducere possunt, præcipue si in horum usu, dicam an abusu, quis perseverat; talia sunt spirituosas fermentata, acido austera, terrestria, &c.; sed in hæc omnia inquirere animus non est, quandoquidem loquimur hîc tantum de iis morbis, ad quos producendos per propriam vitam corpus humanum idoneum natum est: hinc hæc annotasse sufficere existimo.

§. 11. Postquam nunc vidimus quid vitæ vis polleat in partibus nostris solidis, & quænam sit illa ab hujus actione producta Rigiditas, fons sane multorum & mirabilium in corpore morborum, etiam examinandum erit, sed breviter tantum, quid morborum ex hac rigiditate fluidis in corpore accidat, ut sic ex binis his fontibus, quorum unus alteri originem dedit, repullulantes morbos examinare accuratius possimus: nam solida & fluida nostra tam arcto sibi juncta sunt vinculo, ut si morbosa quædam in alterutro prædominari incipiat diathesis, hæc vel illa facile in consensum trahantur.

§. 12. Homo itaque, quo tempore vasculis minimis destitui incipit, simul tunc patitur jacturam humorum illorum, qui vascula hæc implebant antea, h. e. subtilissimorum, unde caret quo-



quoque effectibus illis, qui ab horum præsentia pendent. Jactura hæc major est vel minor, prout plura pauciorave talia vascula abolentur; hinc si olim in aliqua corporis parte millena exstiterint vasa, ubi nunc est callus, in illa mille olim fuere liquores, ubi nunc est nullus; unde videmus quod solida fluida tunc copiâ exsuperare incipiant: hinc ab utriusque sublatâ proportionem multa incommoda ut homo experiatur, necesse est. Sed, secundo, solida etiam vi exsuperant fluida, propter rationem ante traditam, hinc humores qui per vasa minora, minimaque libere fluere debent, magnam patiuntur resistantiam, quæ eo usque augetur donec humores penitus expellantur, & vasa ipsa concrecant: his concretis, augetur etiam vis seu robur in vasis majoribus, hinc horum liquida incipiunt premi, & comprimi, nam duo hæc inter se differunt, novimus enim quod aqua in Vesicâ, ex. gr. inclusa valide premi possit, h. e. sustinere vim corporis prementis, sed hæc aqua minime tamen est compressilis, h. e. ejus partes non patiuntur ut ab exterioribus introrsum premantur, nimis enim sunt rigidæ & homogeneæ; docuit enim hoc Eruditiss. *H. Boerhaave* in pulcherrimis de aqua prælectionibus. Sed liquida nostra compressilia an sint, minime est dubitandum; constant enim ex variis partibus, h. e. sunt heterogenea: hinc humores nostri quodammodo sunt Elastici, h. e. compressi se iterum restituunt; patet hoc quodammodo in sanguine è venâ educto, qui, ubi paululum stetit, nonnihil elevatur. Plura vero ad hoc confirmandum adducere experimenta, haud necesse existimavi. Ex his nunc omnibus plures alias liquidis accidere debere mutationes, & quasnam, unusquisque, credo, intelliget. Pergente interim solidorum hâc Rigiditate, & minimorum abolitione fluida quoque incipiunt retropelli versus cor; nam arteriæ suæ dilatationi nunc magis resistentes non recipiunt totam illam massam à corde projectam, sed ei valide obsistunt, adeoque & cordi propellenti, unde æqualis ille humorum fluxus deficere sensim incipit, hinc munera ab ejus integritate pendentia, præcipue secretiones interrumpi incipiunt: per quæ omnia corpori iterum variæ morbosæ mutationes accidunt. Nam, ut homo sanus vivat, requiritur, ut vasa sint in tali proportionem ad fluida, respectu suæ capacitatis & copiæ, ut tantum sanguinis accipere possint, quantum cor una vice ejicit, his vero



capacitate & numero decreſcentibus, homo tandem ſuffocatur: nam auctâ interim magis magisque reſiſtentiâ hâc, cor tandem nimis debile evadit quam ut omnem ſanguinem uno ictu expellendum ejiceret, hinc ejus perfectâ evacuatio impeditur, & ſic cor obruitur ſanguine craſſo, viſcido valde & lento: interim in multis vaſis variæ fiunt concrectiones, propter humorum motum adeo retardatum; qui eſt inter præcipuas ſanguinem fluidum conſervantes cauſas: adeo ut ipſi humores cum propriis ſuis vaſis in ſolidum corpus penitus concreſcant; quod denuo cauſa eſt majoris, in partibus ſolidis, roboris.

§. 13. Recenſitas (§. 12.) mutationes omnes in fluidis citius & efficacius contingere, prout morboſa ſolidorum diſpoſitio citius, vel magis increſcit quis dubitat? unde quoque functiones læſæ ab his in fluidis mutationibus productæ, ut citius in hoc quam illo appareant corpore, neceſſe eſt. Sed ne in hiſce longus nimis videar, pauca tantum hæc B. L. præmittenda eſſe judicavi; ut ex iis tamquam fonte morborum in ſenili corpore apparentium originem atque naturam clarius intelligere, diſtinctiusque exponere poſſimus. Adeo ut jam ex dictis liqueat, quid mutationis machinæ noſtræ quoad ſolida & fluida ſenſim accidat: quænam ſit memorata illa Rigiditas, ſons ſane, unde tot & tam mirabiles morbi emergunt: neque etiam intellectu obſcurum eſt, quænam diverſitas ſtructuræ partium ſolidarum quoad varias Ætatis partes, ſcil. quo homo à ſua origine remotior, eo habet primô fibras magis cohærentes; ſecundô, magis denſatas; tertiô, eô habet vaſa ex fibris facta magis cohærentia; quartô, eo habet pauciora vaſa; horum enim numerus, à quo infans ex clauſtro materno emittitur, imo jam diu ante, continuo minuitur: ſic ut manifeſtum ſit, quod vivere noſtrum tantum ſit ſicceſcere & rigeſcere, hæcque omnia increſcere quo homo diutius vivit. Hinc evidens eſt, quo Ætas eſt provectior, eo ſolida vi & copiâ fluida exſuperare magis; hinc fluida ſenſim imminui, & quidem omnium primo ſubtiliſſima deficere. Tandem, inquam, ex iis quæ diximus patere, quosdam morbos ultimæ hominis Ætati debere eſſe proprios: quinam autem horum ſint præcipui, jam videamus.

§. 14. Senectutem ſummopere ſemper honoratam atque cultam fuiſſe, tam ſacra quam profana tradunt ſcripta: imo hæc ho-



homini à summo Numine tamquam beneficium summum concessa dicitur, & ut hanc obtineat omnis fere mortalis optat, speratque; imo quis est tam fractis viribus & decrepitæ adeo Senectutis, ut non se putet, saltem speret unum adhuc annum esse victurum. Cum tamen, ut vera fateamur, hæc sit miserrima hominis Ætas, utpote longa morborum serie concomitata: unde veteres Senectutem ipsam morbum jure pronuntiare non veriti fuerint; hinc elegans ille Poëta *Ovidius*, qui tam pulchre Senectutem verbis ubique depinxit, suo tempore sequentia jam cecinit:

— — — *sed jam felicior Ætas*

*Terga dedit, tremuloque gradu venit ægra Senectus*

*Quæ patienda diu est.*

Ab hac quoque sententia magnus *Hippocrates* non alienus videtur, ipse enim ille Senex, lib. 1. *ἐν Ἀγῆης*, senes omnium maxime morbis obnoxios pronuntiat; & ubique in suis scriptis de morbis, qui senes invadunt, mentionem facit: adeo ut revera nulla sit corporis functio, quæ tandem aliquâ ex parte morbosa non evadat. Functionum tamen quasdam præ aliis citius deficere, ex dictis jam colligere est; illas scil. quæ vasis & humoribus subtilissimis, h. e. spiritibus & nervis peraguntur solis: spiritus, ut optime dixit *Verulamius*, omnium, quæ in corpore fiunt, fabri sunt atque opifices; his vero deficientibus, etiam functiones, quæ ab harum præsentia pendent, ut deficient necesse est. Unde patet quare homo prima Senectutis incommoda circa sensus tam externos, quam internos patiatur, h. e. quare Visus, Auditus, Tactus, Gustus, Olfactus, Memoria &c. hebetiores fiant, qui antea adeo vivaces & integri exstiterunt. Sed in hos omnes sensus, ut & in reliquas corporis functiones læsas, paulo propius inquiremus.

§. 15. Visus sensuum nobilissimus & magis dilectus, utpote quam plurimarum rerum cognitionem homini præbens, in Senio sensim magis magisque obtunditur; adeo ut objecta non tam clare & distincte repræsententur, imo aliquando vix percipiantur. Læsum huncce sensum magno nostro *Hippocrati* haud innotuisse, quis dubitat? Cum senex ille Sect. 3. Aphor. 31. *ἀμελωπίαν*, sive oculorum hebetudinem inter cætera Senectutis incommoda recenset. Ratio hujus phænomeni an non arridet hæc:



hæc : quod scil. tenerrima retinæ expansio facta sit minus sensibilis, propter nervorum consolidationes & ariditates; unde requisitus ille in retina pruritus evanescit sensim, quo tunc fit ut hæc à lucis radiis minus vivide afficiatur, hinc impressio facta non ut ante sensorio communi offeretur; unde tunc simul menti excitetur idea, rei visæ minus vivida? videtur certe simile quid hîc obtinere; multæ enim arteriæ hos nervos concomitantur, unde harum continuatâ actione simile quid posset hic produci ac (§. 8.) diximus. An verò quis hujus imminuti visus causam potius attribueret humoribus oculi, antea diaphanis valde, nunc vero minus pellucidis, & deficere incipientibus, an eorum tunicis opacis & exsiccatis corrugatisque, quo fieret, ut lucis radii non tam vivide & distincte oculum transirent? certe humores illos in senibus incrassari immeabilesque reddi propter subtiliorum defectum minime est dubitandum. Unde ab eadem hâc causa nasci & vitium illud, senibus quoque frequentissimum, quod *Hipp.* eodem aphor. vocat γλαυκώσιν; malum in lente crySTALLINA proprie hærens. Depravatur & insigniter Visus per vitium illud senibus adeo molestum, & quod *Hippocrati* audit ὀφθαλμῶν ὀρεότητες, estque tantum fluxio humorum acrium rodentium in senilibus corporibus abundantium, per quos oculi tam externæ quam internæ partes mire labefactantur & excoriantur. Aliud adhuc circa visum phænomenon in senibus examinandum est, πρεσβυωπία scil. vitium omnibus fere senibus proprium, & incipientis Senectutis signum: quo fit ut objecta non nisi remotiora ab illis cerni queant. Hujus rei ratio hæc ne arridet; quod scil. propter vasorum minorum defectum, humores subtiliores etiam in oculo deficere incipiant; unde tunc humor aqueus, subtilis satis etiam copia minuitur; interim partes solidæ oculi interiores se sensim magis contrahunt, propter auctum solidorum robur, contrahit & se cornea tunica, cujus superficies magis nunc applanatur, quibus omnibus tunc fit, ut radii lucis incidentes nimis divergentes fiant, hinc illi in retina non colliguntur, sed post illam quasi adhuc divergunt, unde tunc objecta confuse præsentantur? Contra hoc malum, illud excogitavit humana industria remedium, ut scil. hi homines utantur vitro dioptrico convexo, quod facit ut lucis radii magis convergentes in retinam incidant. Ex hujus nunc phænomeni consideratione credo in-



intelligere est, quare homines, qui oculos in juventute habuere prominentes valde, h. e. qui Myopes fuere, cū reliquis sensibus jam senescere incipiant, *πρεσβυωπία* tamen non laborent. & quæ plura sunt ejusmodi.

§. 16. *Auditus* inter sensus ad discendum aptissimus, an non in Senibus plerumque læsus deprehenditur, sic ut *Βαρυνοσία* sit præsentis Senectutis comes? Pauci certe sunt Senes, quos de hoc vitio conqueri non audiamus, unde etiam sapiens Senex illud inter Senectutis mala proposuit. Quis autem minetur, qui considerat subtilitatem hujus organi & multitudinem organorum huic sensui inservientium; è quibus si quoddam à naturali conformatione aut statu deviarit, statim molestia quædam percipitur; adeo ut millenis hic sensus modis deturbari possit. Verum an hujus læsi sensus in Senibus hæc non existit causa; quod scil. nervi acustici portiones duræ, & molles, per internam hujus organi cameram distributæ, factæ sint callosæ & aridæ, unde tunc radii sonori membranis trementibus communicati, ope horum nervorum concussorum, nunc exsiccatorum, ad sensorium commune deferri impediuntur, vel saltem illud minus vivide afficiunt, & sic ibi ideam soni minus vividam excitant? An vero hujus vitii causam potius attribuendam quis putaret ligamentis, & musculis malleum, incudem, stapedem nectentibus, moventibusque rigidis factis, quemadmodum in senio sæpius obtinet? Lubetne læsum hunc sensum, membranis tympani, ovali, rotundæ, callosis factis imputare? Media enim tympani lamella tota vasculosa est; unde per horum vasculorum abolitionem tale quid accidere posset ac antea diximus: certe si omnia hæc perpendamus, nihil obstare video, cur similia horum læsorum sensuum causæ existere non possent; præcipue si attendamus ad ea, quæ dissectio senilium cadaverum conspicienda dedit: narrat egregius *Baglivius*, se, in cadaveribus viri cujusdam nonagenarii, & alterius octogenario majoris, non modo nervos, verum ipsum cerebrum tam durum aridumque invenisse, ut cultro inter secandum ejus duritiem perciperet. Quid nunc ex tali cerebri nervorumque constitutione sequi debeat, unicuique judicandum relinquo.

§. 17. *Tactum* in senibus si examinemus, quam mirabiliter plerumque stupet in illis hic sensus, qui tamen antea custos ex-



stitit fidelissimus, corpus ab injuriis externis internisque defendens; quique tam vividus alacrisque fuit olim, ut infans recens natus vix pateretur minimum attactum, quin sentiret. Cum contra adultus, & maxime Senex, quamvis partes pungantur, imo urantur, sæpe vix sentiant: adeo ut facile, ni fallor, concipiamus, senilia corpora variis injuriis externis præcipue, alias facile evitandis, suscipiendis idonea evadere. Hujus nunc læsi sensus causa, an non jure quodam hæc dici meretur, quod sc. totum nervosum systema minus mobile evaserit, procul dubio propter nervorum consolidationes, spirituumque defectum; unde motus papillis tangentibus impressus non, saltem minus vivide sensorium commune afficit, unde tunc ibi excitatur idea rei tactu perceptæ minus distincta & vivida? Nonne & multa alia hic concurrunt; ut epidermidis callositas & siccitas, quibus fit ut papillæ tangentes non satis vivide affici possint? Imo hæ ipsæ papillæ per epidermidis callositatem callosæ redduntur. Sane si consideremus, ut Tactus peragatur, requiri, ut epidermis & cutis sint bene constitutæ, ut sc. sint humidæ perspirabiles & flexiles, & quæ si non obtinent sensum hunc depravari, (quam parum enim sentientes sunt manus hominum durissima corpora tractantium, ut fabrorum ferrareorum; Epidermis ibi & cutis quasi coriaceæ factæ sunt: quam parum sentit pars corporis cicatrice obducta, propter minorem ibi perspirationem &c.) tunc dico non absonum fore, dicta, pro causis hujus læsi in senili Ætate sensus, agnoscere. Ex hujus rei consideratione Medico patet, quam mire varient in effectu suo, varia tam interne quam externe corpori applicata, pro varia Ætate. &c.

§. 18. An non & circa *Gustum* Senes quasdam patiuntur mutationes, quæ morbosæ aliquomodo dici merentur? omnino, nam pleraque, quæ antea grata & sapidissima illis erant, nunc insipida & detestabilia fere evasere, sic ut plurima corpora aliam penitus naturam illis induisse videantur. Diverso penitus modo juvenis & summus Senex aceti sapore afficiuntur; hic enim ab eo abhorret, huic vero placet: adeo ut revera hæc in gustu mutatio illis morbosa evaserit, vix enim norunt amplius noxa ab innoxiiis sapore distinguere; quo iterum fit ut varia illis, propter morbosam hanc mutationem, immineant pericula: huc accedit, quod destituantur fere illis voluptatibus, quas homo juvenis & sa-



sanus ex saporibus haurit, quos Deus pluribus eduliis, & potabilibus indidit varios. Hujus denuo depravati gustus ratio, an non petenda est ex consolidatis & abolitis vasculis minimis nervosisque, quibus hic sensus peragitur, quorumque cessante actione, etiam hic sensus cessat? Lubetne etiam hoc vitium à constrictis poris vaginalum membranacearum papillas investientium derivare? an ab iisdem membranis consolidatis nimis, quo fieret, ut materies gustanda vix, vel saltem minus quam requiritur, ut gustus distinctus excitetur, papillis applicetur? Hæc & innumera plura hic concurrere, nihil ob stare video. Liquet simul ex hoc phænomeno, quam varios effectus præstant in corpore res sapidæ, pro majori minorivi nervorum mobilitate, vel pro ut varia est Ætas; &c.

§. 19. Quis tandem miretur, si de labefactato *Olfactu* Senes sæpe conqueri audiamus? peragitur enim hic æque nervis & spiritibus ac reliqui sensus: unde à consolidatis & exsiccatis nervosis fibrillis fit, ut odora effluvia motu inspirationis per nares adducta, atque ad fibras olfactorias applicata, minus vivide illas afficiant; unde tunc in sensorio communi excitatur idea rei Odoratu perceptæ minùs vivida. An non & membrana olfactoria hujus imminuti & depravati sensus causa existere potest, quatenus nimia siccitate laborat, unde particulæ odoriferæ non involvuntur quasi in humore partes illas naturaliter oblinente & humectante? An etiam absolum foret credere, Olfactum in Senibus mirè lædi à vitio illo, quod *Hippocrates* Senibus adscribit, & vocat *ῥινῶν ὑγρότητες*? per hoc enim vitium necessario fit, ut partes nervosæ, continuo illo acrium humorum fluxu, excoriantur & insensiles reddantur. Hinc probabile valde, hæc & innumera plura, quæ brevitatis gratiâ omitto, læsorum in Senibus sensuum causas existere, puto.

§. 20. Visis itaque iis, quæ circa sensus externos Senibus accidere consuevere, pauca etiam de sensibus internis, ut *Memoriâ*, *Imaginatione*, *Ratiocinatione*, animi affectibus, &c. dicenda sunt. Videamus ergo breviter. De his labefactatis sæpissimè conquerentes audimus Senes, & quidem præcipue de labascente *Memoria*, pretioso sane illo, ab optimo Conditore nobis dato thesauro; quo si nos destituisset, quam pauperes essemus; etenim ne per minimum temporis spatium in iisdem cogitationibus ma-



nere possibile esset : neque ullius præteriti unquam recordaremur : adeo ut tota fere humanitas , hâc sublatâ , evanesceret. Memoria nunc in nobis fieri dicitur , si conditio quædam sensorio communi , à quacunque causâ , tam fortiter inhæreat , ut actione aliorum objectorum superveniente mutari nequeat : tum enim menti præsens erit continuô idea quædam huic conditioni respondens. Vel , secundo , Memoria in nobis fit , si , occasione causæ similis , aut ideæ illi affinis , quam in nobis olim excitaverat impressio quædam sensorio communi , excitatur idea eadem , quam si tunc concomitatur conscientia similis olim perceptæ , vocatur Memoria. Sensorium nunc commune esse aliquam Cerebri medullofi partem , pro cujus varia mutatione , quæ ibi tantum est mera mechanica dispositio , mens etiam variè afficitur , quis hodie dubitat ? Hinc in eo idearum adeoque & memoriæ causam latere , probabile valde existimo : unde haud ineleganter videtur dixisse *Helmontius* : *si quis laboret ut rei oblité reminiscatur sensibilibus percipit hunc sibi laborem in syncipite*. Sed quis præcise sit locus , ubi mens sic afficitur , non determino ; neque etiam utile fore multa , & procul dubiô incerta de his proferre , existimo , sed hæc tantum annotasse , sufficere puto. An nunc aliud quid pro causâ hujus labascentis in Senibus Memoriæ agnoscere quis vellet , quâm minorem systematis nervosi mobilitatem , adeoque & sensorii communis , quâ fieret ut idem illud minus vivide afficeretur à quâcunque causâ , hinc conditio ei impressa , quæ ibi ( uti diximus ) tantum est mechanica dispositio , per actionem alicujus objecti , tam debiliter inhæret , ut actione aliorum objectorum , facile & brevi destrui possit ; unde sic menti nulla amplius memoria idearum , prius perceptarum , restaret ? Unicuique certe in his cogitandi libertatem relinquo. An non & inde , aliquomodo intelligitur , unde fiat , quod Senes Ratiocinatione atque Judicio minus valeant ? *Judicium* enim tantummodo est , propositionum ex ideis compositarum justa concatenatio : Unde videmus ad Judicium requiri , primo , clarum rerum repræsentamen : secundo , memoriam rerum propositarum : sed utrumque labascit , ergo & Judicium ut vacillet , necesse est. Adeo ut , quoad ad sensus hosce , parum a puerorum naturâ differre decrepiti observentur. Unde nunc vacillatio imaginationis , attentionis &c. , proveniant , ex dictis quisque



que forte intelliget. His intellectis, (sed minus clare ut vereor explicitis) si rogatur, cur illa, quæ in juventute Memoriae imprimuntur, plerumque optimè ei inhæreant, & contra, quæ in provecta valde ætate, non diu memoriâ retineantur; an dico hujus rei ratio hæc dari non posset, hoc sc. inde fieri, quia in primâ Ætate sensorium facile afficitur, hinc impressiones diu retinere potest; in senio vero summo, illud difficulter afficitur, inde impressiones non diu valde retinet: & simul quia tum jam multis aliis perceptionibus gravatum est. Quid tandem sentiendum sit de illa veterum sententiâ, sed ab *Helmontio* rejectâ valde, quæ pueris memoriam ideo vividam concedit, propter Cerebri teneritudinem, facile suscipientis quælibet sigilla; sed Cerebro per ariditatem duriori, sigillorum impressiones tanto magis arduas fore, quanto ad retinenda conceptuum stigmata sunt ex ariditate pertinaciores: & quousque procedat hæc sententia, acuto Lectoris ingenio committo.

§. 21. Vidimus sic (§. 15--21.) Sensus tam Externos, quam Internos in Senibus notabiliter imminui: Verum dico, illos omnes sæpe, pro tempore totaliter aboleri; h. e. Senes sæpissime Apoplexiâ corripiri: qui morbus senibus familiaris est, unde & hunc *Hippocrates* inter Senectutis mala proponit. Quamvis tamen huic *Hippocratis* pronuntiato repugnare videatur Aphor. 57. Sect. 6. ubi dicit *Apoplexiæ fiunt autem maxime a quadragesimo anno ad sexagesimum usque*. quæ Ætas certe nondum senilis adeo est dicenda. Sed considerandum hic est, Apoplexiam non ab unâ eademque causâ, sed à variis humorum morbofis degeneracionibus produci posse. Sic bilis atra in actum deducta in Melancholicis, sæpe Apoplexiæ causa existit. Quia nunc *Hipp.* observaverat, hanc atram bilem maxime agere à quadragesimo ad sexagesimum annum; hinc recte videtur dixisse Senex, quod Apoplexiæ maxime fiunt à quadragesimo ad sexagesimum annum, à melancholico sc. succo. Confirmavit nunc & hoc clariss. Vir *H. Boerhaave*, *Præceptor meus indefessus*, ad ultimæ meæ Ætatis finem usque Venerandus, in auro pretiosiore libello, cap. de Apoplexia, ubi atrabilariam acrimoniam, circa 40. & 60. annum, agentem inter causas hunc morbum præcedentes recenset. Apoplexia, vero quæ contingit à pituitâ, vel defectu spirituum, familiaris est Senibus, utpote hisce humorum vitiis labo-



rantibus : hinc optime iterum sapiens Senex hanc inter Senum miseras reposuit. Morbum autem hunc oriri ab impedito spirituum cerebri fluxu in organa sensuum , motuumque voluntariorum ; & vicissim ab impedito refluxu ab his organis ad ipsum sensorium commune , multiplex docuit observatio. Unde facile videmus hunc morbum , Senibus debere esse familiarem propter ipsum horum spirituum defectum : horum actione cessante cessant & pleræque corporis operationes : hinc egregie dixit rursus *Verulamius* : *si quis posset in corpore senili restituere spiritus , quales sunt in juvene , consentaneum est rotam hanc magnam reliquas minores circumagere iterum posse ; & revera sic est.*

§. 22. Ex dictis etiam intelligere est , quare senile corpus , ad motus voluntarios quoscunque , torpidum adeo & inhabile fiat ? Partes enim motibus exercendis destinatae , præcipuâ movente destituuntur causâ , h. e. spiritibus : & illi qui supersunt adhuc , inordinato & inæquali ad partes determinantur motu. Unde alius iterum mali in Senibus obtinentis causam intelligimus , tremorum scil. in variis membris , motibus exercendis destinatis , ut manibus , brachiis , cruribus , pedibus &c. : hinc Senibus fere proprium est , dubio & tremulo passu incedere. Huc denuo accedit , quod ipsa organorum fabrica , his motibus peragendis destinatorum , sensim magis magisque destruat ; unde actiones à legitimâ horum organorum fabricâ pendentes , ut impedianur , necesse est : quod etiam postea videbimus. Ut autem ordine quodam in hisce iterum pergamus ; postquam de externis internisque sensibus labefactatis imo sæpe abolitis quædam diximus , respiciamus , jam ad qualitates senilis corporis mutatas , & ad morbosum ejus habitum , ex quibus consideratis , innumera iterum phænomena , in senili corpore occurrentia , intelligi possunt.

§. 23. Homo itaque , postquam varia circa sensus advenientis Senectutis expertus est incommoda , incipit , quoad habitum suum , multa quoque præsentis jam Senectutis , manifesta præbere signa : mirum enim in modum hæc omnia mutari incipiunt , unde quidam poëta huc respiciens scitè cecinit :

*Hæ sunt primitiæ mortis ; his partibus Ætas  
Defluit , & pigris gressibus ima petit.*

*Non*



*Non habitus, non ipse color, non gressus euntis;*

*Non species eadem, quæ fuit ante, manet.*

Nam tota Senum cutis fit rugosa & arida, præcipue circa oculos & frontem, quæ prius tam levis & explicata exstitit, unde totius hominis facies mirè deturpatur. Ratio hujus rei an non videtur hæc, quod scil. propter consolidata, & abolita vascula cutanea, quæ prius humoribus impleta erant, partes exsiccantur, & hinc, propter auctam contrahendi vim, rugas intermedias formant? torositas enim illa, quæ prius ob repleta vascula aderat, jam recessit. An vero hujus ariditatis causam statuere quis velit, defectum pinguis illius exsudantis ex folliculis vel cutaneis glandulis, cuti leniendæ, & flexilem retinendæ, destinati? In senio autem omnes glandulas minores fieri, imo tandem evanescere, senilium cadaverum dissectio docuit. Ex hac cutis rugositate considerata, credo intelligere iterum est, quare Senum perspiratio sensim minuatur, monentibus bene *Sanctorio* & *Gortero*? Resp., primo, propter cutim sensim magis duram, densamque. Secundò, propter frequentia sputamina, Senibus adeo infesta: nam retenta utpote incapacia coctionis, monente *Sanctorio*, impediunt perspirationem, unde insensibilis illa evacuatio in sensibilem pituitam vertitur. Clare etiam ex dictis videtur intelligi posse origo pruritus illius per univsum corpus, de quo Senes sæpe conqueruntur, & de quo *Hipp.* supra allegato Aphor., mentionem facit: quæ videtur hæc, quod scil. multi humores propter segniorem circulationem, & excretionem impeditas, stagnando acres fiant, qui ad exteriora corporis nonnihil propulsi, propter vasorum constrictiones & consolidationes ibi hærentes, pruritum illum excitant.

§. 24. Memoratam cutis ariditatem, & constrictionem quoque existere causam sequentium, & sæpe obtinentium in senibus morborum, non improbabile videtur: scil. primò Destillationum, tussim adferentium; quem morbum *Hipp.* vocat καλὸν ῥῆσιν βηχῶδες. Secundo, *δυσαντοίας*, & tertio, illorum morborum, quos Aphor. 40. Sect. 2, vocat βραγχῆς, ἢ κορυζῆς, &c. quibus omnibus sæpissime senes affligi notum est. Causa nonne videtur hæc, quod scil. propter cutis ariditatem & constrictionem, excrementa evacuari solita facillimè intro pellantur, & intra  
cor-



corpus retineantur; quo sæpe tunc fit, ut materia illa ad partes delata, dicta symptomata excitet; si ad pulmones, & quædam acrimonia ei juncta sit, vellicando nervos ibi excitat κατάρπες βηχώδεις: pulmones infarciendo, δυσπνοίαν: si vero ad asperam arteriam deferatur, facit βραγχίτις: si ad nares, κορύζας, &c.? Sed secundo, quia corpus nostrum tam interne, quam externè est perspirabile, & probabile valde est, similes ariditates etiam obtinere in partibus internis, quales in externis, hinc memoratos morbos etiam oriri posse propter ipsas has partes nimis exsiccatas & imperspirabiles redditas, nihil obstare video. Huc accedit tertio, quod senilia corpora multis cruditatibus, humoribusque frigidis & lentis sunt obsessa, propter labefactatas coctiones, & deficientem calorem; quibus omnibus fit, ut hi morbi facile producantur, qui tunc etiam, monente Hippocrate, coctionem non admittunt.

§. 25. Ab eadem hâc materiæ perspirabilis impeditâ evacuatione, partim etiam produci σεμνίστην, morbum Senibus infestum valde, absonumne adeo est statuere? Multæ enim particulæ falsæ & acres, quæ in junioribus per sudores, aut perspirationem evacuari solebant, in corpore retinentur; quæ in massâ sanguineâ oberrantes, per renes ad vesicam delatæ, ibi stillatim cum sensu ardoris excernuntur. An non & eadem vaporum cutaneorum &c. constrictio, partiumque impedita perspiratio, producit ἀρθρων πόνοις, sive articulorum dolores, Senes adeo excruciantes? Videtur certè ad hunc morbum producendum suum conferre symbolum: nam propter coctiones labefactatas, partesque minus perspirabiles redditas, multa colliguntur excrementa, h. e. multi humores acres simulque tenaces congregati, rodendo & distendendo lædunt vascula minima; hinc summos circa illas partes excitant dolores. Rem hanc quodammodo exinde confirmatam videmus, quod scil. paroxysmi arthritici, seu podagrici, tam immaniter sæviunt, si quoddam vitium commissum fuerit, quod perspirationem impediret, sive retardaret. Reliqua nunc mala, ab his, similibusque causis originem trahentia, credo, ex dictis facile intelligentur: hinc ut brevis sim, ad alia quædam pergo.

§. 26. Ex iis itaque quæ diximus, nemini mirum videri, credo, quare Senum corpora, ad varia perficiunda munera, tam in-



inepta fiant : non solum enim spiritus , opifices omnium , quæ in corpore fiunt , hic deficiunt , sed ipsa organa ad varios in corpore exercendos motus inepta fiunt & tarda , quæ antea agilia valde exstiterent. Corpus enim infantis recens nati , quam flexile est , quam mobiles existunt omnes artus ? attendat modo quis ad ejus pedum digitos , quam variis certe modis flectere & movere illos hinc inde valent ? In adultis vero , imo in prima adhuc *Ætate* , hi tunc etiam immobiles fere existunt ; adeo ut tum jam rigiditas quædam videatur adesse. Sic se nunc res habet in summo Senio cum omnibus membris. Sed quid miremur ? Adorandus Creator ut corpora nostra flexilia construeret , partes majores ex minoribus & tenuioribus conflavit , h. e. vasa ex vasculis , musculos ex fibris &c. , & inter horum interstitia continuo humores decurrere voluit , concretionem impedientes. Hæc nunc est ratio , quare infans recens natus tam flexiles & mobiles habeat partes , habet enim plurima vasa & liquida ; & omnes partes , quæ ossescunt postea , ibi adhuc sunt cartilaginosa , omnes membranæ fere adhuc vasculosa , tendines molles valde adhuc , & vasculosi ; quæ certe omnia tale corpus valde flexile reddunt. Si vero senile examinemus corpus , quam mirabiliter ibi omnia concreta sunt , & exsucca , sicut Anatome exhibet musculos senilium corporum in tendines penitus conversos , tendines in cartilagines , cartilagines in ossa durissima : omnes enim novimus , quod carnes animalium annosorum , ut boum , anatum , gallorum , similibusque si adponantur , quod sæpe dentibus comminui , imo acuto vix scindi queant cultro , adeo ut hæc animalia , si vivere pergant , tandem quasi ossescant. Exemplum rursus habemus , quod præbet os cordis cervi annosi , de quo commentatus est pulchrè *Vesalius* contra *Galenum* , qui ipsum os in corde statuebat ; cum tamen illud nihil aliud sit , ut bene monet *Baglivius* , quam portio aut arteriæ aortæ , aut pulmonalis , per repetitam cordis contractionem , prius in cartilaginem , dein in osseam substantiam mutata. Quod nunc similia in humano corpore per *Ætatem* contingant , multæ quoque docuere observationes : quarum unam alteramvè hic adducere lubet. Refert *Bonetus* de homine Sene subito extincto , in cujus corde tres valvulae semilunares osseæ reperiiebantur. In alio casu , totum septum cordis osseum observatum est. Vidit & *Harvæus*



in homine fortissimo portionem arteriæ magnæ prope cor in os conversam. De hac quoque re me certiores fecit Lumen illud in Anatomicis studiis *Professor B. S. Albinus*, *Præceptor meus nunquam sine reverentia nominandus*, qui mihi de hac re affirmavit quærenti, se in senili cadavere portionem alicujus vasis majoris, si bene memini, arteriæ aortæ, cartilaginosa penitus invenisse. Adeo ut videamus in Senibus non modo musculos mutari in tendines, tendines in cartilagineas, & cartilagineas tandem in ossa dura, verum etiam tenuissimas prius membranas suam successive propriam naturam amittere. Cartilagineas autem, quæ naturaliter sic manere deberent, in senili *Ætate* ossescunt; inspectio enim cadaverum totam arteriam asperam osseam invenit; quæ procul dubio Dyspnœæ & suffocationis causa in illo homine fuit. Sic refert idem *Bonetus*, partes costarum cartilagineas, in osseam substantiam induratas inventas fuisse. De cartilagine mucronata in senibus ossea reddita, narrat idem auctor; quæ omnia procul dubio respirationem difficilem illis hominibus reddiderunt.

§. 27. Liquet itaque, si enarrata omnia considerentur, musculis, tendinibus, membranis, cartilaginibus accidere, quinam effectus ab his partibus sic mutatis produci debeant; scil. impedimentum, vel abolitio illorum motuum, qui ab his partibus naturaliter constitutis, sponte, vel determinante voluntate, producerentur. Sed aliæ adhuc quamplurimæ impeditorum motuum, præter enarratas jam, existunt causæ, quarum præcipuas tantum breviter adhuc examinabimus. Primo, defectus olei & pinguedinis, naturaliter tendines & musculos lubricantium, reddit plerumque has partes aridas & siccas, unde tunc cum magna difficultate motus suos peragunt. Secundò, quod notabile, ad omnes articulos, sive ossium juncturas, prudens Creator posuit sacculos, oleo sive smegmate ab *Haversio* inventore, *Haversiano* dicto, repletos, ad articulationes lubricandas motusque faciles reddendos, destinato; quod smegma ibi secernitur ope fabricæ glandulosæ: sed quia jam antea monuimus, quod in senilibus corporibus totum glandulosum systema immi-nuatur, imo tandem penitus evanescat, hinc dico pulchrè intelligimus, quare Senum ossa, dum incedunt, vel ea movent, ut cum manducant, adeo strideant? Videtur certe non aliam



ob causam id fieri ; quam quod smegma illud lubricans deficit, unde hæ partes motæ stridorem illum excitant. Sed tertio, ipsa quoque ossis mutata in senibus fabrica causa fit, cur motus difficilior peragantur : non possumus enim, quin iterum hîc miremur infinitam Conditoris sapientiam, qui in medio fecit ossa duriora, circa extrema vero sive juncturas latiora, & magis ad naturam partis mollis accedentia : lamellæ enim osseæ circa juncturas à se invicem magis secedunt & disperguntur, quo fit, ut interstitia fiant ibi majora, hinc etiam numerus vasorum ibi major est, quam in medio ossis, ubi lamellæ sunt magis compactæ. Ab arteriis nunc illis, qui per periostium internum decurrunt circa juncturas, quamdiu homo sanus vivit secernitur oleum subtilissimum medullosum, quod in cavis vesiculis deponitur, ut pinguedo in membranâ cellulosâ; oleum hoc per motum corporis, & vi circulationis per istas lamellas distribuitur, imo per poros in cava juncturarum exsudat, ibique miscetur cum smegmate illo, vel solum reddit articulationem lubricam satis ; quia nunc hoc oleum, per attritum majorem circa juncturas, quam in medio, majori ibi copiâ consumitur, hinc Natura ibi vasa secernentia & vesiculas majori copiâ posuit. Verum in maximè provectâ Ætate, ubi omnia exsucca & arida facta sunt, etiam ipsa ossa magis consolidata & exsucca facta sunt, propter vasa etiam ibi abolita & consolidata : (ne interim quis miretur me hoc effari, nam omnia ossa olim mera vasa fuisse probabile valde est.) Unde tunc quoque fit, quod secretio illius pinguis sensim deficiat, unde tunc articuli destituuntur illo bono, quod ab hujus olei præsentia producebatur, h. e. lubricatione. Ex hisce consideratis plurima intelliguntur phænomena in senibus sæpe occurrentia ; ut, quare ossa sæpe tam fragilia evadant ? Docet & hoc Chemia. Cur ossa Senum si frangantur tam difficilè iterum increcant ? Resp., quia vascula illa, quæ fundere debent succum, unde callus generatur, deficiunt. Quid autem statuendum sit de illa veterum sententiâ, asserente Senes ideo plurimum catharris esse obnoxios, quod eorum crania penitus consolidata, & futuris destituta impedirent, ne vapores exhalarent, non determino. Sed quartò, ipsa ligamenta in corporibus senilibus sunt causa impeditorum adeo motuum. Sunt enim hæc singularia penitus corpora, fortissi-



ma, quæ tamen debent constare partibus flexilibus satis, ut sic hæc ipsa, partesque annexæ moveri commode possent. Verum & hæc in summo senio arida & rigida fiunt, sic ut tota vertebrarum columna, cæterum flexilis satis, in unum continuum rigidumque corpus concreta sit inventa: ibi enim ligamenta vertebrae nectentia, prius flexilia satis, in osseam substantiam concreverant. Similia etiam reliquis ligamentis accidere minime est dubitandum. Ex his etiam intelligitur, cur vulnera his partibus inflicta tam difficulter consolidentur.

§. 28. Ex consideratione itaque præcedentium credo jam manifestam esse rationem, quare Senum corpora incurvari sensim incipiant, ita ut ad terram, è quâ producta sunt, magis magisque iterum accedere videantur, cum tamen antea capite erecto, ut cælum adspiciant, incedere consuevere? a nulla certe alia causa hoc provenit, quam ab accurtatione ligamentorum, vertebrae ad sese invicem magis magisque adducentium, sicque ad anteriora flectentium & figentium; quo tunc fit ut corporis statura sensim imminuatur, sic ut Senes tunc decrescere iterum dicantur: de hac corporis imminutione inter alias Senectutis miseras *Cumæam* apud *Ovid.* conquerentem audimus:

*Tempus erit, cum me de tanto corpore parvam  
Longa dies faciat: consumptaque membra Senectâ  
Ad minimum redigantur onus;*

Non solum ligamenta sic contrahuntur omnia, unde totum corpus imminutum apparet, sed etiam reliquæ solidæ partes molliores, propter ariditatem, expulsis & repulsis liquidis, totam corporis molem minuunt: hancque imminutionem haud inconcinne egregius *Verulamius* comparat cum exsiccatione, & imminutione nucleorum in nucibus, qui siccati non amplius totam testam implent, sed contracti corrugatique iis includuntur.

§. 29. Ne autem in hisce diu nimis versari videar, (immensus enim hic esset campus) ad alia quædam adhuc in Senibus examinanda me accingo phænomena. Occurrit inter hæc, primo canities, signum à Senectute inseparabile, & per quod Senectutem ubique descriptam videmus, quodque legimus, etiam in sacris, in summo semper fuisse honore: sic *Levit.* lex erat, ut quis coram cano capite consurgeret, & personam Senis honoraret. In *Proverb.* dicitur, quod dignitas Senum sit canities, &c. Imo  
apud



apud ipsos *Ethnicos* canitiem in honore fuisse, testis est *Ovid.* qui canit:

*Magna fuit capitis quondam reverentia cani,  
Inque suo pretio ruga senilis erat.*

Canities vero hæc nil aliud est, nisi pilorum cujuscunque etiam antea fuerint coloris in canum mutatio, quæ eorum senium arguit. Phænomeni hujus causa hæcne arridet, quod propter humorum subtilium defectum, ipsi pili iis destituantur, unde quoque eorum cava non amplius irrigantur, quo tunc fit, ut color pilorum antea varius, pro varietate istius liquidi pilos diaphanos antea replentis, tandem evanescat, & pili exsuccī & aridi in colorem canum permutentur, qui color omnibus nostris solidis partibus, omni humido destitutis, videtur proprius. Succedit canitiei ipsum calvitium; adeo ut hominis caput, quemadmodum pleraque plantas hyberno tempore frondes, & nonnullas aves pennas amittere videmus, capillorum ornamento privatum cernamus. Causa procul dubio hæc est, quod sc. pili omni omnino destituantur alimento, hinc tunc fit, ut, radicibus sive bulbis aridis & contractis redditis, ipsi pili mortui defluant: quamvis multæ aliæ hic concurrere videantur causæ, ad hunc pilorum defluxum producendum, ut siccitas & ariditas cutis cui inhærent, unde pili destituuntur tunc oleo sive pingui hos flexiles conservante: hoc enim deficiente, similes capillorum defluxus in junioribus contingere scimus. An hujus calvitiei causa existit, ut quidam putarunt, distantia meningum a cranio, quas, juxta *Bonnetum*, observationes in Senibus calvis sic distare docent, quo tunc fieret, ut cranium superjacens, huicque superposita tegumenta minus essent irrigua, adeoque inepta continendis, & nutriendis capillis? parum certe hoc attribuere videtur.

§. 30. Quemadmodum nunc caput capillis, sic mandibulas dentibus destitutas cernere est. Hi enim, qui tam validi, integri, & pulcherrimi antea fuere coloris, nunc attriti, nigerrimi, exesi, & decidui hominis os mire foedant. Has in dentibus mutationes pulchre observavit *Helmontius*, qui etiam dentibus *Ætates* suas attribuit: dicit enim, dens qui post octennium hominis candorem vitri opaci vel lapidis limacis refert, adolescens est; splendidus & politus tunc est ejus color albus: deinde sensim pallefcit, mox dein surde albescit tanquam ebur, & juvenus est dentis; tum postea obscure



pallet ut in syncopizatis virginibus spectatur, estque ejus *Ætas* virilis: atque tandem pallide flavescit ossis instar, procul dubio ab oleo incipiente corrumpi, *Ætas* tunc senilis incipit: postremo autem dens cariosus, cavus, niger, verminosus & olidus fit, quæ *Ætas* dentis caduca est. Hunc lapsum dentium producere videtur deficiens nutritio, à qua omnium partium stabilitatem dependere scimus, quamvis multa alia hic concurrant, ut exsiccatio carnis gingivarum quæ illos carnose adhuc in alveolis retinebant: ipsa quoque alveorum cavitas minuitur sensim; unde dens quasi extruditur: humores quoque varios pituitosos, frigidos circa dentes collectos, omnia hæc mala augere, non improbabile videtur: frigida enim juxta *Hipp.* & *Helmont.* dentibus sunt inimica. Facile nunc iterum ex hujus dentium defectus consideratione concipimus, manducationem, præcipuam ad ciborum concoctionem promovendam actionem, insigniter lædi: (quid enim actio dentium in cibos valeat, corporis functionum periti satis norunt.) Hinc est quod egregius *Bellini* dixit, in infantibus & Senibus, quia utrique dentibus carent, fieri chylum minus coctum, verum magis crudum & frigidum: eoque magis quia hi humoribus minus vividis & dissolvendo aptis præditi sunt: propter chylum quoque minus coctum etiam reliquæ coctiones deturbantur, unde iterum varii morbi. Huic tamen dentium defectui aliquomodo occurrere voluit prudens Creator, qui sic utramque mandibulam construxit, ut dentibus elapsis, eorum alveolis attritis, ciborum comminutio per eorum margines consolidatas aliquomodo peragi possit, quemadmodum in Senibus quotidie videre est. Humana quoque industria pro viribus occurrere hinc videtur: monet enim sæpius jam laudatus *Verulamius*, quod tria sint, quæ huic defectui prospicere possunt. Primum, ut alii dentes renascantur, quod tamen omnino difficile videtur, nec absque instauratione corporis integrâ perfici posse. Secundum, ut mandibulæ per debita adstringentia sic firmentur, ut officio dentium quodammodo, fungi possent: quod non male cedere posse videtur. Tertium, & omnium optimum est, ut cibi pro senibus ante assumptionem sic præparentur, ut ista dentium actione non egeant: unde expressiones & concisiones ciborum minutas, eosque bene conditos &c., Senibus utilia pronuntiat. Altera quæ à dentium defectu in Senibus læditur actio, est loquela. Nemo



mo hoc mirabitur; qui considerat, quid dentes cum reliquis organis ad sonum, in faucibus editum mutandum, & varie determinandum, valeant. Ultimo dico, quod ipsa facies mire mutetur propter utramque dentium deficientem seriem: distantia enim ab inferiori nasi parte ad mentum longe minor fit, hinc mentum ad anteriora prominulum redditur, sic ut reverâ tota facies hominis suam figuram, proportionemque amiserit. Quoniam autem video, Dissertationem in nimiam molem increfcere, brevitati studens, hinc, omissis reliquis corporis senilis calamitatibus, an quædam etiam circa animi affectus deformitates in Senibus obtineant, videndum tantum restat.

§. 31. De animi affectibus Senum, ut verum fatear, ex propriâ consideratione non multa dicenda habeo, hinc tantum pauca, quæ de his depravatis scripsit *Verulamius*, proponam, ut sic æquus quisque judex, & cui cum Senibus frequens est conversatio, vitia hæc Senibusne competant, nec ne, judicet. Refert Auctor optimus de juvene ingeniosissimo, sed jocosø paululum, qui in Senum mores invehere solitus dicebat; si daretur conspici Senum animos, quemadmodum cernuntur corpora, non minores in iisdem apparituras deformitates: contendebat enim vitia animorum in Senibus corporum vitiis esse quodammodo consentanea & paræla: pro ariditate cutis substituebat impudentiam: pro duritie viscerum immisericordiam: pro lippitudine oculorum, oculum malum & invidiam: pro immersione oculorum & curvatione corporis versus terram, Atheismum (neque enim cælum, inquit, respiciunt ut prius:) pro tremore membrorum vacillationem decretorum, & fluxam inconstantiam: pro inflexione digitorum, tanquam ad prehensionem, rapacitatem & avaritiam: pro labascentia genuum, timiditatem: pro rugis calliditatem: & quæ plura talia. Ipse quoque *Verulamius* sequentia discrimina circa animi affectus Senum & juvenum memorat; dicens: Juveni adest pudor & verecundia, Seni verò occalluit: Juveni æmulatio laudabilis, Seni invidia maligna: Juveni inclinatio ad religionem & devotionem, ob fervorem & inexperientiam mali, Seni defervescentia in pietate ob charitatis teporem, nec non ob credendi difficultatem: Juveni liberalitas & beneficentia, Seni avaritia & sibi sapere & consulere. Juveni confidentia, & bene sperare, Seni diffidentia & plurima habere  
pro



pro suspectis: & plura talia apud auctorem sunt videnda.

§. 32. Sic tandem videmus, ex omnibus iis, quæ de minimorum abolitione & spirituum defectu, deque totius corporis arefactione, & callositate tam internis quam externis diximus, omnia vasa, viscera, & humores in suis functionibus labefactari, hinc omnes coctiones, secretiones, excretiones depravari in senio summo, adeoque & reparationem perditam non amplius fieri: non propter defectum humoris alicujus radicalis, & primigenii irreparabilis, vel appositionem quandam jam ab infantiâ degenerem, ut quidam statuere medici; nequaquam: optime enim rursus dicit *Verulamius*, quod post declinationem & decursum *Ætatis*, spiritus, sanguis &c., facile repararentur, si modo organa has partes reparantia non deficerent; sed hæc activitate suâ & viribus minuta functiones amplius exequi non valent, quibus tum fit, ut omnia paulo post ruere incipiant; sic ut illæ partes quæ in natura suâ reparabiles valde erant, tamen deficientibus reparationis organis, tandem penitus deficient. Adeo ut, postquam homo aliquamdiu vasorum minimorum jacturam passus est, tandem soli humores crassiores per vasa majora lenti decurrant, & Vitam solam absque animalibus functionibus, ut egregie *Clariss. Boerhaave* dicit, sustentant; vivunt tandem Senes quidem, quatenus arterias habent, non vero, quatenus nervos: donec tandem, vitâ adhuc protractâ, mors inevitabilis, naturalis & pure senilis, his Senectutis æumnis finem imponat, & illi, ut lampas olei defectu, extinguantur. Hæc est illa *εὐθανασία*, quam sibi tantopere precatus fuisse dicitur *Augustus Cæsar*; & quæ observata dicitur in *Antonini Pii* excessu, quando non tam mori, quam dulci & alto sopore excipi videretur. Adeo ut revera hæc non sit parva felicitatis pars Senibus concessa, ut cum *Verulamio* loquar, illis præbens, abjectâ prorsus omni sanitatis spe, excessum è vita magis lenem, & placidum. Neque ex iis, quæ diximus, difficile videtur hujus mortis naturalis & inevitabilis, utpote ex ipsius vitæ actuositate sequentis, causam aliquomodo deducere: sc. in summo Senio, vasculis minoribus omnibus fere destructis, solam circulationem per vasa majora fieri diximus; verum hisce vasis majoribus robur, sive resistantia continuo magis magisque augetur supra vim liquidi, sive sanguinis propulsi, unde arteriæ suæ dilatationi resistentes retropellunt sanguinem versus cor,



cor, unde cordi nascitur major resistentia quam superare valet, unde tunc sanguis quasi stagnare incipit ad cor, inter hoc & arteriarum pulmonalium extremitates, unde tunc tandem suffocatio & mors. An potius hujus mortis causam derivare quis vellet a tubulis minimis cerebelli destructis & abolitis; unde tunc spiritus, ad cor fluere impediti, illud impotens reddunt propellendi sanguinem iterum, quo tunc mors placida produci debet? Certe non improbable videtur, quod ipsa vasa cerebelli tandem etiam quasi occludantur, quemadmodum vasa sensuum subtilissima. Sed ut finem Dissertationis faciamus, dico paucis, ex iis quæ diximus de senilis corporis structura, deque ex hæc sequentibus læsis functionibus, patere, cur quidam morbi hominibus ætate provecta valde fiant proprii, & cujus indolis hi sint. Et quare dixerit *Hippocrates*, quod morbi, qui Senibus accidunt, sint longi, sed debilius eos afficiant, & maxima ex parte comitentur ad mortem usque? Videmus sic etiam cur homo morte naturali vel fato senili extinguatur, & quo tum morbo? Quodammodo etiam intelligimus ex dictis, quid statuendum de vitæ prolongatione per medicamenta sit, ut jactant quidam Chemicis? an, & quousque hæc arti possibilis sit? Tandem etiam colligere facile est, quis victus, quæ vita, quæ medicamenta Senibus convenient? De quibus, quædam adhuc cum dixero, huic Dissertationi finem imponam.

§. 33. Unam eandemque victus rationem omni Ætati haud convenire, sed pro variâ Ætate corporisque habitu aliam victus rationem esse ineundam, diligentissime Medicæ artis nobilissimæ fundator monet *Hippocrates*; hinc Medicus ad hæc ut attendat oportet. Sic infanti tenello dentibus destituto, & cui viscera sunt debilia, non conveniunt iidem cibi potusque, qui juveni, & viro robusto, sed tales, qui nec dentium, neque viscerum actione valida indigent. Eodem quoque modo se res habet cum Senibus, quibus, propter plerasque corporis functiones destructas, labefactatasque, alia longe victus ratio concilianda est, quam juveni aut viro robusto: Senibus enim primò, cum destituuntur illo bono, quod ab actione dentium cibus accidere solet, tales cibi sunt adponendi, qui masticatione saltem efficaci non egent, hinc ciborum expressiones, minutæque concissiones illis conveniunt. Sed secundò, quia sub Senectute omnium



coctionum facultates deciduæ fiunt, adeoque & ipsa nutritio vacillat, propter defectum vasorum humorumque subtilissimorum, & horum actionum, unde tale corpus ut emaciatur, & exarescat quasi, necesse est; hinc dico requiruntur talia, quæ defectum hunc aliquomodo refarcire queunt; ergo dentur tales cibi potusque, qui magna viscerum, vasorumque actione non egent, quique ante assumptionem jam in se continent tales partes nutrientes, quales in isto corpore, si sanum robustumque esset, fierent: tales sunt lac, præcipue muliebre, sanum, à bono chylo factum, si hauritur suctu, ne in aëre perdat subtilissimum illud spirituosum, unde longe minus illud coquere convenit: lac asinum, caprinum, bubulum huc quoque spectant: jura carniū animalium sanorum scil. rite præparata, ne etiam subtile illud exhalans avolet inter coquendum, hæc tunc jura in se continent partes animalium subtilissimas, ad restaurandas Senum vires aptissimas. Huc nunc quoque spectant multa alia, ut ova, si eorum albumina recentia, lacte diluta, sine ullo igne assumantur; hæc enim tam proxima sunt materiæ nutrienti, ut magna in corpore præparatione non egeant; ex ovi enim albumine, spatio 24. dierum fiunt omnes animalis partes, ne ossibus exceptis, adeo ut hoc in se contineat talia elementa, unde omnia hæc fiunt. Contra, vitanda in senio summopere puto omnia calida, stimulantia, aromatica, quamvis sub titulo stomachicorum, & coctionem promoventium dentur, hæc enim augent causam, unde tot mala; h. e. subtilissima dissipant, & vasorum consolidationes & exsiccationes promovent. Verumtamen, ut spiritus quodammodo reficiantur, assumant Senes pro potu vinum molle, edentulum, aquâ dilutum, nam vini meraci valde, & spirituosius usus depascit nimis spiritus, & rorem corporis blandum superstitem adhuc; unde siccis & Senilibus corporibus non propinandum putarem. Verum, omnibus hisce quamvis summâ cum cautelâ adhibitis, tamen propter debiles coctionum facultates, & longas ambages, quas requirunt alimenta antequam nutrant, videntur quoque summopere Senibus conducere aliæ auxiliares nutritiones, ut per balneationes, unctiones, clysteria, halitus, fots, similiaque: referri huc quoque potest, subtile illud exhalans ex corpore hominis juvenis sani & robusti, quod juxta observationes mi-



mira in senilibus corporibus sæpe præstitit, & cujus effectus jam à longo Medicis haud incogniti fuere: sic legimus Regi Davidi, cum jam præ senio langueret, præscriptum fuisse, ut in eodem lecto cum Rege decumberet Virgo juvenis, sana, & robusta, procul dubio eum in finem, ut Rex attraheret subtile illud exhalans. Observatum quoque fuit, quod Senes, qui juvenum sodalities frequenter se dedere conversatione non interruptâ, longævi fuerint; ut constat de *Pythagorâ* & *Isocrate*, quotidie inter discipulos juniores versatis, hi enim ad centesimum vixere annum. Vulgare quoque fuit receptum olim, ut scil. viva animalia fomentum instar corpori applicentur: sic dicitur quidam *Barbarossa* ad extremam provectus Ætatem ex consilio Medici Judæi continuo ventriculi regioni applicuisse puerulos, cum optima certè virium restauratione: & quæ plura ejusmodi.

§. 34. Quod exercitia vel functiones corporis & animi attinet, horum etiam ratio est habenda: scil. cavendum in senio est à laboribus exercitiisque magnis, hæc enim spiritus superfluitates nimis dissipant, & Senectutem adaugent. Verum contra senile corpus se sensim magis magisque ad quietem componat; hinc frequens dormitio in Senectute quam maximè ab egregio *Verulamio* laudatur; hæc enim compescit deprædationes spirituum, & distributionem alimenti ad partes promovet, unde & revera somnus corpus nutrit; docent hoc exempla plurimorum animalium, per integram hyemem dormientium, sine ullo interim assumpto cibo: hinc somnus quotidie post prandium Senibus debilibusque corporibus utilis præscribitur. Animi autem affectus sensim magis magisque moderandi sunt, nec tamen omnino supprimendi, sed habeant aliquid, monente *Verulamio*, quod cogitationes & animum ipsorum placidè detinere possit, ut sunt studia ædificandi, plantandi, &c. Confortationi spirituum summopere conducere dicitur, si Senes acta pueritiæ vel adolescentiæ sæpius recordentur, quæ recordatio tanquam peculiaris illis est recreatio. Vitandi sunt in senio omnes vehementes animi passionēs, ut gaudia summa, ira, tristitia, mœror, metus, &c.

§. 35. Medicamenta vero quænam Senibus sint propinanda, unusquisque, credo, qui ad morbosam totius corporis structu-



ram, & ad morbos inde resultantes attendit, percipiet: in hisce enim propinandis magna est, quoad varias *Ætates*, differentia: quis enim infanti tenello, recenter nato, nervoso valde, propinare acria, stimulantia, & moventia valde auderet? Certe abhorremus si modo de symptomatibus ab his adhibitis productis cogitemus. Ergo, ut Medicus ad hæc attendat, oportet; quantâ enim cautelâ, & circumspeditione in his semper utatur Vir expertissimus, *H. Oosterdijk Schacht*, *Præceptor meus fidelissimus*, nunc *Promotor exoptatissimus*, in æternum venerandus, norunt illi, qui virum hunc Praxin profitentem, & coram ægris exercentem toties mecum audire & videre. Eodem fere modo se res habet cum Senibus; nocet quoque ibi auxilium quærere in calidis valde spirituosus & fortibus, nam hæc, ut bene monet *Verulamius*, pro tempore quidem flammam excitant, hæc vero extincta, magis iners & oppressum relinquitur corpus: sed è contra senilia corpora tantum irroranda & emollientia sunt, ideo mel cum vino admisto, similiaque, senilibus corporibus summa sunt remedia, hæc enim corpus laxant, & spiritus nonnihil excitant. Ne autem senilia illa corpora propter virium defectum, crassis lentisque humoribus, & sæcibus obruantur, & sic cito suffocentur, hinc horum excretiones tutissimis remediis adjuvandæ sunt, per saponacea sc., ut sunt rursus mellita, saccharina, &c. præcipue si his admiscantur crocus, sal, gummi aromatica, similiaque talia. Ariditatis quoque senilis egregia sunt remedia, fots, inunctiones, clysmata, ex emollientibus, blandis & oleosis; quantum enim hæc præstent solatium, docebit inter veteres Medicus optimus *Hippocrates*; nam hæc omnia durata emolliunt, tensa remittunt, siccata humectant, excrementa eliciunt. Vapores, suffitus ex odoratis, suavibusque huc quoque spectant, nam spirituum confortationi mire conducere observantur; ut præparentur ex jasmino, mellissâ, rosâ, malo aurantio, citrio, similibusque. Hæc tamen omnia, neque specifica à quibusdam Chemicis, Vitæ prolongandæ propofita remedia, vitam in numerosos adeo annos sanam protrahere posse, probabile est: sed è contra, voluntatem divinam dies hominum ad annos 70. vel 80. ut plurimum protraxisse, multis interpositis miseriis, atque tandem, mortem inevitabilem, utpote ex ipsa sanitate sequentem, hisce ærumnis tanquam finem imposuisse, credimus.

En,



En, B. L. quæ de Senectute, ejusque morbis, pro specimine inaugurali exhibere decrevi. Plura, fateor, pulchra addere potuissem, & forte addenda erant; sed moles nimia jam, temporisque penuria, & materiæ gravitas, ne latius exspatiarer, obstitere: hinc, ut eodem animo, quo ego tibi offero, pauca hæcce accipias, enixè rogo.

F I N I S.





# HONORI ET MERITIS

*Egregii Juvenis,*

## PETRI BUTEUX,

*Cum post habitam de MORBIS SENECTU-  
TIS Dissertationem Medicinæ  
Doctor crearetur.*

PETRUS ovat, victoque refert ex hoste triumphum,  
Spes Valacrûm, Valacri plaudite, PETRUS ovat!  
Ille Machaoniae lectissima portio turbæ  
Ornatur titulis, nec sine laude, novis.  
Gratulor O! tantis dignissima munera curis,  
Pirithoi dudum foedere junctæ mihi!  
Labitur en! nitidis quæ laurea ferta capillis  
Nectat, ab aethereo docta Minerva polo;  
Nec, tibi quò summos Divina tradat honores,  
Terricolas renuit Phoebus adire, manu;  
Nec satis hoc; superûm namque agmine cetera factò  
Applaudit meritis capta caterva tuis;  
Non minus auspiciis foecunda Valacria certis  
Messopolisque suo cive superba favet:  
Vicus quoque ridet ager, campique patentes  
Gratanti resonant murmure, PETRE veni!  
Jam tibi porrigitur Neptunia dextera, quæ te  
Mattiaco vegetum reddat, ut ante, solo;  
Et, dum tergemina quatit undas cuspide, curet,  
Illidat coecis ne cita prora vadis:  
Tuta sub Aeolio fluctus tua numine findet,  
Adsideat puppi cum Thetis ipsa, ratis.  
Littora quam dulci strepitant Zelandica cantu,

Et



Et placidum ventis stans mare fausta sonat !  
Obvia procedit laetanti voce juvenus ,  
Et teneras tendit blanda puella manus ;  
Cernis , ut adrepat firmis innixa bacillis  
Quae petat auxilium languida turba senum.  
Reddiderit priscum focero Medea vigorem ,  
Nil mirum ! magica nam fuit arte potens ;  
Tu rigidae morbos , testor tua scripta , senectae  
Non nisi Phoebea doctus ab arte levas.  
I felix ! promptusque tuis succurre medendo ,  
I ! pete Mattiacos Doctor , amice , lares.  
Quod superest , Valacrûm dum mox Podalirius audis ,  
Et patria morbos pellis ab urbe graves ;  
Auguror , en ! nec falsa cano , carissime , vates ,  
Insolitum laeso pectore vulnus ales ,  
Quod neque vel follers poterit curare Machaon ,  
Sed poterit lateri juncta puella tuo.

JOANNES OOSTERDYK SCHACHT.



